

1 Timoteo

Jachuayama

¹ Atše Pablo, Jesucristbe ichmoná sēndmēna. Bēngbe Bētsá bēngbe atsebacayá endmēna y Bēngbe Utabná Jesucristo endmēna ndábeñe bēnga, puerte jtsošbuáchiyēse mondobátmana ba soyēnga bēngbiana cha yochjamama. Atše Jesucristbe ichmoná sēndmēna, er chata tbojanmandá atše chca jtsemnana.

² Timoteo, atše quem tsbuanácha cbontsabo-biamná. Atše Bēngbe Bētsabe soyēngama entšanga sēnjanabuayiyná ora, aca Jesucristbeñe tconjanošbuaché, y chca, aca mo atšbe ndegombre uaquiñacá tconjanóbema. Atše sēntseimpadana, Bēngbe Bētsá Bēngbe Taitá, y Cristo Jesús Bēngbe Utabná, chaboma aca tšabe bendicionēnga chacotsebomnana, chata chacmolastemama y ainaniñe tšabiana ebionana chacotsebomnana.

Pablo chē ndoñe ndegombre soyēnga abuátambayēngbiana chēnga tojanabuayená

³ Ntšamo chē Macedonia luaroye chocana sēnjēftsanbocna ora tcbonjanimpadacá, mora cachiñe cbochtētsimpáda. Efeso puebloca cochjoquéda, básefta entšanga chácua mēndama chē ndoñe ndegombre soyēnga ndoñe chamondētsabuatambama,

⁴ ni nyets tempo ndoñe nyē chamondetsejuabná anteungbe cuentēngama, ni chē ba uabemana

uabáinēnga chē tempsca bēts taitangbiama. Er n̄ye chca yapa jesejuabnayanentšana, jóbocnana n̄ye ín̄yengaftaca jabuachana enatsētsnayiñe, y chca chēngbioye tondayama ntjujabuáchana ntšamo Bēngbe Bētsá jamama yojuabnacá chaósertama. Chē soyna n̄ye chábeñe jtsošbuáchiyēse jobenayana josértana.

⁵ Chca mando entsemna n̄yetscanga chamotsenbobonshánama, y chē bonshánana endóbocana nda chabe ainanentše ndocna bacna soyēnga tondbomnábentšana, ntšamo tojtsamcá tšabá yojtsemna ca ainaniñe tojtsejuabná y tojtsetatšēmbuábentšana, y Jesucristbeñe ndegombre ošbuachiyábentšana.

⁶ Báseftanga tmojtsajbaná chca jtsemnana y in̄ye soyēngama tmojontsé juabnayana; chíyeca chēnga mora imojtsentšena n̄ye ndayám̄naca ndoservena soyēngama enatsētsnayana.

⁷ Chēnga jtsebošana Bēngbe Bētsabe ley abuatambayēnga jtsemnama, pero chēnga ndoñe yontsósertana ni ntšamo imojtsabuatambacá, ni mo ndayám̄naca ntšamo chēnga tmojtsichamcá, mo chē soyēnga ndegombre cuaftsemncá.

⁸ Pero bēnga mondétatšēmbó chē leyēnga tšabá yomnama; tšabá endmēna, chē ndayama chē leyēnga tmojuamcá entšá chē leyēngaca tojtsamēse.

⁹ Bēngnaca mondétatšēmbó, chē leyēnga ndoñe tmonjuama chē n̄yetsca soyēnguiñe tšabá amēngbiama. Chē leyēnga tmonjuama quemētša entšanga jácastigama: ntšamo leyēnguiñe ndoñe tontselesenciancá amēnga y ntšamo Bēngbe Bētsá yobošcá ndámēnga, chē Bēngbe Bētsá ndoñe

imondadoránënga y bacna soye amënga, Bëngbe Bëtsá ndoñe mondërrespetánënga y Jesucristbeñe jtsošbuáchiyana y Bëngbe Bëtsá jtsadoránana tondaye yondoservena ca juabnayënga, cachabe taitá o mamá obánayënga y ndëmuanÿenga imomna entšanga obánayënga,

¹⁰ boyabásaftaca o shembásaftaca bacna soye amënga y boyabásenga cach boyabásengaftaca bacna soye amënga, entšanga enënga nÿe ínÿabiama nÿets tempo chamotseservénama, bosterënga y chë nÿe bonamente Bëngbe Bëtsabiama júrayënga; chca entsayana, chë leyënga yomna jácastigama nÿetscanga ndëmuanÿenga ndoñe tmontsama ntšamo chë ndegombre buatëmbana soyënguifne iuayancá.

¹¹ Ntšamo muentše chë leyëngama tijayancá, entsebuátëmbana chë Bëngbe Bëtsábiocana puerte tšabe noticiënguifne, chë ndegombre buatëmbana soye; Bëngbe Bëtsá, chë corente bendición bomná, šonjichmó chë buayenánana entšanga jabuátambama.

*Pablo Bëngbe Bëtsábioye tbojtanchuá,
tbojanlastemama*

¹² Atše, Bëngbe Utabná Jesucristo sëndëtschuaná, er cha tojanjuabó, ntšamo cha šojanmandacá jobedésama atše tsjétsseprontanama, y chíyeca šojanábuayana atše chabiama chaitrabajama; y cha endmëna nda inétsama atše obenana chaitsebomnama chë trabajo jamama.

¹³ Cha chca átšeftaca tonjanma, masque tempo atše chabe contra ba soyënga sënjánichamo, chabe ústonënga sënjanëcamena, y chabiama tondaye

respeto ntsebomncá sënjánenobuena. Pero Bëngbe Bëtsá šonjanlastemá, er atše, Jesucristbeñe ošbuachiyá cabá ndoñe quetsjátanmëna, y chca, atše ndoñe quetsjátantatsëmbo ndayá tsjánamama.

14 Y chca, Bëngbe Utabná ba tšabe bendicionënga atšbiamama tonjanma, y chábeñe ošbuachiyá šonjábema, y tonjanma atše cha chaitsebobonshánama y ínÿengbioynaca. Cha chca bëngbiamama tojama, bënga cánÿiñe mo canÿacá Cristo Jesúseftaca bëtsemnayeca.

15 Ntšamo chanjayancá ndoñe nÿe bostero soye quenátsmëna, y nÿetscanga entsamna chca ndegombre bëtsemnama jtsejuabnayama: Cristo Jesús quem luaroye tonjánabo, bacna soye amënga jabátsebacama, y chë bacna soye amënguentše atše chë más bëts bacna soye amá sëndmëna.

16 Chíyeca, Bëngbe Bëtsá šonjanlastemá, jinÿanÿiyama cha puerte uantado entsángaftaca yomnama. Y chë soye ínÿengbioye tojaninÿanÿé, chë nÿetsca tescama yomna tšabe vida jtsebomnama, chë chábeñe mochtsanošbuachéngbioye; chca tonjaninÿinÿé cachá átseftaca uantado jtsemnëse, atše nÿetscangbiamama chë más bëts bacna soye amá jtsemnëse.

17 ¡Entšanga nÿets tempo chamotsinÿanÿná, chë Utabná nÿets tempo mandayá y puerte bëtsá y obená yomnama! Cha endmëna chë ndocna te echanjëftsobaná, chë entsanga ndoñe ntsoobenana jinÿamá y chë nÿe canÿe Bëngbe Bëtsá yomná. Chca chaotsemna.

18-19 Timoteo, aca mo atšbe uaquiñacá condmëna. Atše tcbonjaimpadá, ntšamo tcbonjauyancá entšanga chacúyanama,

ntšamo báseftanga Bëngbe Bëtsabe juabna oyebuambnayënga achiamá tmojanayancá, y chiñe jtsejuabnayëse chë Jesucristbe soyëngama chacopeliá y nyets tempo chca chacotsama, Jesucristbeñe puerte jtsošbuáchiyëse, y lempe ntšamo tcojtsamama tšabá yojtsemnama ainaniñe jtsetatsëmbëse. Báseftanga, chënga ndoñe tšabá imonjétsama ca chë ainanoca juabnënga tmojánayana ora, chë soye ndoñe tmonjanuena y chë causa, Jesucristbe soyënguiñe ošbuáchiyana tmojtsanajbananga y tmojanontsé inye buattëmbana soyënguiñe jtsošbuáchiyana.

²⁰ Chca tonjopasá Himeneo y Alejandroftaca, y atše sënjalesenciá Satanás chaoma chata chabosufrima; y chca, chata chabuatsjinye Bëngbe Bëtsabiamá ndoñe bacá ntsóyebuambnayana.

2

Pablo tojanabuayená ntšamo Bëngbe Bëtsá jt-sadoránama

¹ Nyetsca soyama más cbontsaimpadana ndayá chë Jesucristbeñe ošbuáchiyënga Bëngbe Bëtsáftaca chamojtsencuénta ora, nyetsca soyëngama ntšamo tojtsëjabotcá cha chamotseimpadana, nyetsca entšangbiamá, y cha sempre chamotsatschuaná.

² Entsemna, nyetscangbe tšabiamá Bëngbe Bëtsá jtseimpadánama, pero masna quem luarentša reyëngbiamá y inye mándayëngbiamá, chca, nyetscanga puerte natjëmbana jtsiyenama chamuetsobenama, y nyetsca soyënguiñe tšabá jtsamëse, Bëngbe Bëtsá jtsatschuanayama, y entšangbe juabniñe tšabá chamotsemnama.

³ Chca jtsamana tšabá endmëna, y Bëngbe Bëtsá, bëngbe Atsebacayá, chama jtsóyejuayana;

⁴ y chca jtsóyejuayana, er cha endboše nyetsca entšanga atsebácanënga chamotsemnama y chë ndegombre buayenánana chamotsábuatmama.

⁵ Chca nyetsca entšangbiana endmëna, er nye canye Bëngbe Bëtsá nyetscangbiana endmëna, y nye canya endmëna nda yobena jamama entšanga tempcá tšabá Bëngbe Bëtsáftaca chamotsemnama; cha endmëna Jesucristo, cach entšá.

⁶ Er Jesucristo, mo canya ínýenga játsebacama cuaftopagacá, chabe derecho vida jtsobomñama cachcá tojanonýa y tojanóbana, chca, nyetsca entšanga chamotsobenama atsebácanënga jtsemnama. Chë soye cha tonjaninýanyé, nya chama tempo yojtsemna ora, chë Bëngbe Bëtsá nyetsca entšanga atsebácanënga chamotsemnama yobošama.

⁷ Bëngbe Bëtsá chca nyetsca entšangbiana yobóseyeca, Jesucristo šojanábuayana chabe ichmoná jtsemnama, chabe soyënga entšanga jtsabuayiynayama; ndegombre soye sëntsoyebuambná, ndoñe quetsátsbostero. Sonjanmandá chë ndegombre buayenánana chë ndoñe judiëngbioye jabuátambama, y chënga entsamna chiñe jtsošbuáchiyana.

⁸ Ntšamo sënjayancá, atše sëntseboše nyetsca chë Jesucristbeñe ošbuachiyëngcá enefjuana luarënguenache, boyabásenga Bëngbe Bëtsáftaca chamotsencuénta, y chora celoye, Bëngbe Bëtsábioye cucuatše chamatsbaná; pero chamna, ainaniñe bacna soyënga ntsebomncá, ínýengaftaca

ntjatentjayanaycá, y ínÿengaftaca jabuachana ntjatenatsëtsnaycá chënga chamotsemna.

⁹ Y atše sëntseboše shembásenga entšayangá chamuatíchëtjo, mo chë tšabe shembásenga mondbetsichëtjoncá, ndoñe nÿe entšanga chamotsëbuáuatjama y ntšamo tmojtsichëtjonama chëngna uámanënga imomna ca entšanga chamotsejuabnama. Ndoñe quenátamna jtsenóbotamnayana, nÿa mo chca chquëcnënga jtsemnëse, ni castellano soyëngaca o uámana fjantse ndëtšbéngaca, o yapa uámana entšayangaca, chca, nÿe entšanga jinÿama tšabá jtsemnama.

¹⁰ Pero aíñe mo chë Bëngbe Bëtsá adóraye shembásenga mondbetsamcá jtsamëse, chë tšabe soyënga jtsamana.

¹¹ Nderado nda tojtsabuatambá ora, shembása bontsemna jtsatsjëndayana, chca ora tondaye ntjatichamcá, y chentša mándayënga chaotsayau-nana.

¹² Atše ndoñe quichatsleséncia, canÿe shembása boyabásenga chaotsabuatambá, ni chaotsamënda. Canÿe boyabása tojtsabuatambá o tojtsamënda ora, shembása ndocá chaondëtsichamo.

¹³ Chca chaotsemna, er Bëngbe Bëtsá natsana Adán tbojanpormá, y chentšana Eva;

¹⁴ y er Satanás Adánbioye ndoñe tbonjaningñé, ndayá chë shémbioye; y chca tbojaningñé ora, chë shema tojanma ntšamo Bëngbe Bëtsá ndoñe tbonjanlesenciácá.

¹⁵ Pero shembása atsbocaná echántsemna, básenga quem luaroye endbaúshejangoyeca, pero chamna, aíñe nÿets tempo Bëngbe Bëtsábeñe

tojtsošbuáchese, nyetscanga tojtsababuányeshanëse, cachá nyetsca soyënguiñe jenomándama tojtsobenëse, y nyets tempo tšabe soyënga tojtsamëse, ntšamo Bëngbe Bëtsabe entšanga mondbetsamcá.

3

Ntšamo ibojtsemna chë ošbuachiyëngcá enefjuanëngbeñe mandayá

¹ Mëntšá ndegombre endmëna: nderado nda tojtseboše canye trabajo jtsebomnama, cányentše ošbuachiyëngcá enefjuanentše chë inye ošbuáchiyënga jtsamëndayama, cha ndegombre yojtseboše canye puerta tšabe trabajo.

² Chíyeca, chë ošbuachiyëngcá enefjuanëngbe mandayá bontsemna jtsiyenana ba tšabe soyënga jtsamëse, chca, cha ndoñe tšabá yontsama ca ndocná chaondëtsichamuama. Y mëntšánaca cha bontsemna jtsemnama: nye canye shembásabe boyá; ntšamo jtsiyenama tšabá juabnayá chaotsemna, cachá nyetsca soyënguiñe jenomándama chaotsobena, y chaotsetátšëmbo ndayá ibomna tšabá jtsamana; chaotseprontana chabe yebnentše posada entšanga júyentšamiama, y chaotsobena botamana abuatambayá jtsemnama.

³ Ndoñe yapa tmoyá o penzentero chaondëtsemna; pero chaotsemna tšabá mandbomná, entšanga natjëmbana chamotsiyenama bošá, y ndoñe chaondëtsejuabná nye crocénana jésebomnama.

4 Chaotsetátšëmbo ntšamo nyetsca chabe yebnentša entsanga botamana jtsamëndayama, y chaoma chabe básenga chë ntšamo cha tojayancá chamotsamama, ndocna te stëtsoye chamondëquedama;

5 er, nda cachabe yebnentša entsanga ndoñe tontsobena jtsamëndayama, chca, ¿ntšamo nantsobena chë ošbuachiyëngcá enefjuanënga jtsanýenama?

6 Cha ndoñe chaondëtsemna cabá mora cuenta Jesucristbeñe ošbuachiyá; aíñe chca chë ošbuachiyëngcá enefjuanëngbe mandayá tojtsemnëse, nderado nye cachá uámana entšá nantsenobiamnaye, y ntšamo Bëngbe Bëtsá Satanásbioye tbonjancastigacá, chca bëtsemnama, cach soyama Bëngbe Bëtsá chë entšábioye buanjacastíga.

7 Chánaca bontsemna jtsiyenana jtsamëse, y chca chaojtsama ora, chë Jesucristbeñe ndošbuáchiyënga tšabá chabiamama chamot-sichamo. Chë entšá ndoñe chca tontsamëse, chënga chabiamama mochanjayana ndoñe tšabá yontsama ca, y Satanás echanjama cha chabócochëngo bacna soyënga jamama.

Ntšamo ibojtsemna chë ošbuachiyëngcá enefjuanënga ujabuachaná

8 Cachcá, chë mándayëngbe ujabuáchanënga mëntšá entsamna: uámana entsangcá nyetscanga chamotsétabna, uta palabra ndbomnënga; ndoñe yapa vínoye chamondëtsetmó, y ndoñe chamondëtseboše nye paselo becá crocénana jtsebomnama.

9 Chënga entsamna ndegombre jtsošbuáchiyana chë Bëngbe Bëtsá tojinýanyé soyënguiñe, chë ndayiñe bënga mondošbuaché, chëngbe ainaniñe inýetsá juabnënga ntjatsbomncá.

10 Natsana, chëngbiama botamana šmochjshauarrepára jtsetatšëmbuama chënga aíñe o ndoñe montsobena mo chë ošbuachiyëngbeñe mándayëngbe uajabuachanëngcá joserviama. Chënga nyetsca soyënguiñe tšabá tmojtsemnëse, šmochjálesenciaye chiñe chamoservema.

11 Cachcá, chë shémanga mëntsá entsamna: nyetscangbiama mo uámana entšangcá utabnënga, ndoñe uayátsenayënga, cachënga nyetsca soyënguiñe jenomándama obenënga, y nyetscañe tšabe palabra bomnënga.

12 Canye uajabuachaná chaotsemna nye canye shembásabe boyá, y chaotsetátšëmbo ntšamo chabe básenga y nyetsca chabe yebnentša oyenënga jtsamëndayana.

13 Chë uajabuáchanënga tšabá chiñe tmoservënëse, canye uámana puesto mochanjashjache, y chënga mochantsobena bëts añemoca jtsóyebuambnayama ntšamo Cristo Jesúsbeñe tmošbuáchema.

*Ndayá Bëngbe Bëtsá bënga sojinýanyecá, canye bëts
buatëmbana soye endmëna*

14 Atše sëntsobátmana pronto chjobenaye jama aca jauatsëtsayama; pero chca cbontsabobiamná,

15 nderado atše betscó jama ndoñe sënjobenase, chacotsetatšëmbuama ntšamo canya ibojtsemna nyetsca chë Bëngbe Bëtsábënga imomnëngaftaca. Chënga mondmëna chë

Jesucristbeñe ošbuáchiyënga, chë Bëngbe Bëtsá Ainabe básenga. Chënga chë Bëngbe Bëtsabe ndegombre soyënga mondbomna chë más uámana puestoca quem luarentše, y tša mondëntšena chama ínÿengbioye jáyëñanama.

¹⁶ Nÿa ndegombre endmëna, Bëngbe Bëtsá soyënga šojinÿanÿé, y chë soyëngaca bënga montsobena jtsiyenana, chë Bëngbe Bëtsabe entšanga imomnëngcá; chë soyënga bëngbiana ndegombre bëts buatëmbana soye endmëna, y chë buatëmbana soye mëntšá endmëna:

Cristo quem luarentše cach entšacá entšángbioye tojánebëbuacna.

Chë Uámana Espíritu tonjinÿanÿé cha nÿetsca soyënguiñe tšabá amá yomnama.

Angelënga cha tmojáninÿe, y chabiana ba luarënguentša entšángbioye tmojanabuayená.

Ba entšanga quem luarentše chábeñe montsanošbuaché, y Bëngbe Bëtsá celoye tbontanatsbaná, cha puerte bëtsá y obená yomnama jinÿanÿiyëse.

4

Báseftanga chë tsabe benachentsana mochtso-juánañe

¹ Uámana Espíritu, nÿetscanga catafjosertaycá tojayana, quem luare jopochócama tempo chaojtsobeco ora, básefta entšanga camocht-sajbaná ošbuáchiyana chë ndayiñe bënga Jesucristbiana mondošbuaché soyënguiñe ca. Chëngna, espíritënga entšanga áingñayënga mochántsayanana, y chë ndoñe ndegombre

soyënga chë bacna bayëjënga entšángbioye mochtsabuátambaye soyënguínna.

² Chca buatëmbana soye jtsóbocanana chë bacna entšanga ntšamo ndegombre tmojuabnacá nd-inÿinÿnayëngbentšana y chë bosterëngbentšana. Chënga chca bacna soye tmojtsama ora, ainanoca ndoñe ntsejuabnayana, ntšamo tmojamcá ndoñe tšabá yontsemna ca, er yapa bacna soyënga tmojama causa, chënga nÿe chca chëngbe ainaniñe jësejuabnayana.

³ Quem entšanga ndoñe ntjalesénciana ínÿenga chamotsobouamama, y jtsemándayana básefta sananga entšanga ndoñe chamondëtsesama. Ntšamo chënga chiñe tmojtsebuatëmbacá ndoñe ndegombre soye ntsemnana, er Bëngbe Bëtsá chë sananga tojanma, Jesucristbeñe ošbuáchiyënga y chë ndegombre soyënga uabuátmënga chamóyëngacñama, Bëngbe Bëtsábioye chama jtsatschuanayëse.

⁴ Er lempe ntšamo Bëngbe Bëtsá entšanga chamosama tojamcá tšabá entsemna. Ndoñe quešnátamna ndaye saná jtsaboténana, bënga chë saná tmojuáyëngacñe ora, Bëngbe Bëtsá chama tmojëtschuase;

⁵ er chca saná Bëngbe Bëtsábioye tšabá jtsinÿnana, cachá chca tojayánayeca, y bënga chë sanama cha mondbatschuayama.

Jesucristbiana trabájayiñe canÿe tšabe oservená

⁶ Aca, chë soyënga ošbuachiyëngbioye chacojtsabuátambase, aca Jesucristbiana trabájayiñe canÿe tšabe oservená cochántsemna. Y mo nda bëtscá añemo jtsebonnama botamana

tojtsesacá, cachcá, ácnaca puerte ošbuáchiyana y ainaniñe bēts añemo cochántsebomna; chca echántsemna, chē bēnga mondošbuaché buayenana soye aca icuatsjendá y icoyeunánayeca, y ntšamo chē tšabe buatēmbana soyēnguiñe endayancá sempre icuámayeca.

⁷ Pero ndoñe n̄ye quem luarentša entšangbe cuentēnga y ndoservena cuentēnga cattsuena. Ba soyēnga cochjama aca bēts añemo ainaniñe chacotsebomnama, mo nda bēts añemo jtsebomnama cachabe cuérpoca ba soyēnga cuaftsamcá, ntšamo Bēngbe Bētsá jadórama yomncá jtsiyenama jtsamēse;

⁸ cachabe cuérpoca ba soyēnga jamana más añemo jtsebomnama, aīñe batšatema endoservena; pero jtsiyenana Bēngbe Bētsábioye jadórama yomncá jtsamēse, puerte enduámana y juajabuáchana n̄yetsca soyēnga tšabá chaotsemnama; chca jtsamana puerte tšabá endmēna cachabe vidama quem luarentše, y chē in̄ye vidócnaca.

⁹ Ntšamo tijayancá ndegombre entsemna, y n̄yetscanga entsamna jtsejuabnayana chca ndegombre bētsemnama.

¹⁰ Y chē soyama bēnga puerte mondētrabája y mondēsufrina, er chē Bēngbe Bētsá Ainábeñe puerte mondošbuachéyeca, bēnga mondobátmana cha yochjama soyēnga bēngbe tšabiamana. Cha endmēna chē n̄yetsca entšangbe atsebacayá, pero ndegombre masna, chábeñe ošbuáchiyēngbe atsebacayá cha endmēna.

¹¹ Ntšamo quem soyēngama tcbonjauyancá

entsanga cochtsamëndaye y cochtsabuátambaye.

¹² Ndoñe catjaleséncia, aca bobontse comnama, ndánaca chacmotsáboyënjama. Pero aíñe bëtscá cochtsama, chënga puerte chacmotserrespetánama, chca jtsamëse icoyenama jtsonyáyëse, cachcá chamotsamama: botamana jtsóyebuambnayëse, nyets tempo tšabe soyënga jtsamëse, nyetscanga jtsababuányëshanëse, Bëngbe Bëtsábeñe corente jtsošbuáchiyëse, y puerte tšabia jtsemnëse, ainaniñe ndocna bacna soye ndbomná.

¹³ Atše choca chaijashjanguëntscuana, cochtsentšena chë Bëngbe Bëtsabe uabemana palabrenga entsángbeñe jtsalíayama, y chënga jtsabuátambayama y jtsabuayiynayama.

¹⁴ Achioye Bëngbe Bëtsá obenana tmojanatšetá tšabe soyënga jamama chacotsobenama, ošbuáchiyënga jujabuáchama. Bëngbe Bëtsabe juabna oyebuambnayënga acbiama tmojanoyebuambá ora, y chë ošbuachiyënguentša bëtšëjémënga chëngbe cucuatšënga ácheñe tmonjancjá y Bëngbe Bëtsá acbiama tmonjanimpadá ora, chca tšetana obenana tcojanóyëngacñe. Chë soye sempre cochtsinýena.

¹⁵ As, aca cmontsemna sempre jtsamana chë soyënga ntšamo tcbonjauyancá. Cochtsentšena chë soyënga tšabá jtsamama, chca, entsanga chamobená jinýama, aca cada te más tšabá lempe cojtsamama.

¹⁶ Botamana cochtsantješna, aca chë tšabe soyënga jtsamëse cojtsiyenama, y chë tšabe buatëmbana soye ínýenga cojtsabuátambama. Cada te chca cochtsama, y chca, cach aca cochan-

jenájabuache atsbocaná jtsemnama y chë ácbioye ouenanëngnaca játsebacama.

5

Ntšamo Timoteo ibojtsemna chë inye ošbuáchiyëngaftaca jtsemnana

¹ Bëtsëjémënga ndoñe catjucácana; chca játamamna, cochjábuayenaye, chënga mo cach acbe taitá cuaftsemncá; y chë bobontsëngaftaca cochjama, mo chënga acbe catšátanga cuaftsemncá.

² Chë bëtsanana shembásengaftaca tšabá cochtsemna, chënga mo cach acbe mamá cuaftsemncá; y chë tobiasëngaftaca cochjama, chënga mo acbe uabénanga cuaftsemncá; chëngaftaca cmontsemna puerte tšabia jtsemnana, chëngbiama ndocna bacna juabnënga ainaniñe ntsebmncá.

Ošbuáchiyëngbenache viudanga tmojtsemna ora

³ Chë ndegombre viudanga, chë ndocná mondbomna chaujabuachama, chënga cochtsarrespetana y cochtsëjabuachana.

⁴ Pero canye viudá nderado básenga o nietënga tuabamna, chënga entsamna natsana jshauatsjínÿana ndayá chënga chamotsamama Bëngbe Bëtsá yobošcá, cachëngbe pamíllanga chamotsarrespetánama, chëngbioye jtsanÿenëse, y chëngbe bëtsëtsangaftaca tšabá chamotsama, ntšamo chënga chëngaftaca tmojanmcá, er chca jtsamama, Bëngbe Bëtsá jtsóyejuayana.

⁵ Chë ndegombre viudá, chë juajabuáchama ndocná tbondbomná, Bëngbe Bëtsábeñe jtsošbuáchiyëse, cha bochjuájabuachama

jtsobátmanana, y nyets tempo jtseimpadánana, bnëté y ibeta, cha chabuájabuachama.

⁶ Pero canye viudá, nye quem luarentsa entsángaftaca oyejuayá jtsemnama soyënga tojtsamëse, cha masque ainá tojtsemna, Bëngbe Bëtsabe bominyiñe mo canye obanacá jtsemnana, er chábioye ndoñe ntseservénana.

⁷ Lempe chë soyënga chamotsamama ošbuáchiyënga cochtsamëndaye, chca, ndocná ndocna bacna soye chëngbiana jatichámuama chaondëtsebomnama.

⁸ Er, nda cachabe entsanga y más, cachabe pamíllanga ndoñe tontsacuedana, cha chca jtsinÿinÿayana chë buatëmbana soyënga, ndayiñe bënga mondošbuaché, ndegombre soyënga ndoñe yondmëna ca yojtsejuabnama, y cha chë ndoñe ošbuáchiyëngbiana más bacna entsá jtsemnana.

⁹ Chë jujabuáchama viudanga imuábemana lístañe, chaotsábemana chë viudá chnënguana bnëtsana uatama más yobomná, y nye canye boyá ibnabomná.

¹⁰ Entsanga cha chamotsábuatma mo canye tšabe soyënga amacá: chabe básenga botamana tojabëché, áshjajnënga chabe yebnentse posada júyentsamiama prontaná, Bëngbe Bëtsabe entsanga imomnënga tojushecjabebé, chë imosufrínënga tojújabuache; jayanana, nda sempre nyetsca tšabe soyënga jamama yontšená.

¹¹ Pero chë lístañe, chë viudanga chnënguana bnëtsana uata cabá ndbomnënga ndoñe catjúbiana; er chë chëfta uata ndbomnënga, yapa nye cachënga tšabá jtsemnama juabnënga jtsebomnana y soyënga jtsamana. Chcase, chënga

Jesucrístbioye ya ndoñe ntseservénana, y chora jtsebošana cachiñe jtétóbouamayama;

¹² y chca, ínÿenga chëngbiamá mochanjayana ndoñe tšabá montsama ca, chënga chë ntšamo tempo Bëngbe Bëtsá tmojanšbuachenacá chënga ndoñe tmonjamama.

¹³ Y cabá más, tondaye ntsamcá tmojtsemna ora, chënga juabouinÿana oyënjayënga jtsemnama, y yebnënguenache jtsanama; y ndoñe nÿe oyënjayënga, sinó oinÿanëngnaca, ínÿengbe soyënguiñe jtseyentšbëtsjuanëse, y ndoñe yontsemna jayanama soyënga jtsichámëse.

¹⁴ Chíyeca, atše sëntseboše, chë viudanga cabá tobiasënga chamuatobouamá, básenga chamotsabamna, y chamotsobena cachëngbe yebnënguenache jtsemándayana; y tondaye chamondëtsama, chca, bëngbioye uayayënga chamuayana, chënga chca ndoñe tšabá montsama ca.

¹⁵ Atše chca sëntsichamo, er básefta viudanga cabá tobiasënga tmojtsajbaná Jesucristo obedecénana, y tmojontsé Satanás joyeunayana.

¹⁶ Canÿe shembása, Jesucrístbeñe ošbuachiyá, nderado chabe pamíllangbeñe viudanga tojtsabamna, cha bontsemna chënga jujabuáchana, chca, chë ošbuachiyëngcá enefjuanënga ndoñe chaondëtsamna chëngbiamá játantješnana; chca, chë ošbuáchiyënga mochanjobenaye chë ndegombre viudanga, chë chaújabuachama ndocná mondbomnëngbioye jujabuáchama.

Ntšamo cuantsemna chë ošbuachiyëngbeñe amëndayëngaftaca

17 Chë bëtsëjemënga, tšabá chë ošbuachiyëngcá enefjuanënga tmamëndangna, jtsomerecénana entšanga más chamotsarrespetánama, chca trabajo bëtsamama, y más, chë sempre entšanga jtsabuayiynayama y jtsabuátambayama imontšenëngbioye.

18 Er Bëngbe Bëtsabe uabemana palabrënguiñe endayana, mëntsá: “Aca canye toróftaca shajuana tmojtsatbaná luariñe chacojtsetrabája ora, ndoñe catjuanguëtsenaye ca”; ínÿoca: “Chë trabajayá merecido jtsebuájonana juácanama ca”. Chíyeca, chë bëtsëjemëngcá amëndayënga jtsomerecénana entšanga chamotsarrespetánama.

19 Nderado nda tcmojáuyana canye bëtsëjema bacna soye tojama ca; pero útata o unga entšanga más ndoñe tmontsemna, chca tojamama tmojinÿe, y chë bëtsëjema mal quedayá ndegombre soye yojtsichamo ca ndoñe tmonjayana, ndoñe catjóyeunaye.

Inÿe soyëngama jábuayenama

20 Chë bëtsëjemënga nÿe bacna soyënga tmojtsamënga, nÿetsca entšangbe delante cochjucácana, chca nÿetscanga uatjana chamuishache, bacna soye amama castigo mochtsebomnana.

21 Atše cbontsemánda, Bëngbe Bëtsabe delante, Jesucristo y Bëngbe Bëtsabe bocacana angelëngbe delante, chë mandënga chacotsamama; pero ndoñe catjayana canye bëtsëjema tšabá o ndoñe tšabá tonjama ca, cabá ndoñe lempe botamana ndabonÿe ora, ni canye entšá ínÿengbiana más tšabá ntjatabacacnaycá.

22 Ndocnabe bestšašiñe cucuatšënga catjajájua, Bëngbe Bëtsábioye chabiamana jaimpádama, jinÿinÿiyama cha mo canÿe bëtsëjema amëndayacá joserviama yojsobenama, nÿe betso, juabuáyanama botamana ntjenajuaboycá. Pero nÿe ntjenajuaboycá chca tcojamëse, y cha canÿe bacna soye amá tomnësna, ácnaca cochántsemna mo chabe bacna soyënga cuafjamcá. Cochtsantješna ndocna bacna soyënga ainaniñe chacondëtsebomnama.

23 Aca ba soye uafshiacana condbëtsešoca causa, ndoñe más nÿe ena búyeshe cattseftmana, sinó base vínoynaca.

24 Entšanga mondobena tšabá jinÿana, básefta entšangbe bacna soyënga, cabá chë soyëngama chëngbioye botamana ntjátjaye ora; pero ínÿengbe bacna soyëngama, nÿe tcojátjayentšana entšanga chama jtsetatšëmbuana.

25 Cachcá, báseftanga entšangbe delante tšabe soyënga jtsamana, y cachora chë soyëngama jtsotatšëmbuana; y ínÿengna iytëmncá tšabe soyënga jamana, pero masque chca, ndayténaca chë tmojanma tšabe soyëngama ínÿengna mochanjátatšëmbona.

6

1 Chë nÿets tempo nÿe ínÿabiamana oservénënga entsamna, chëngbe nduiñëngbiamana jtsejuabnayanana, chënga uámana entšanga imomnama y nÿets respeto jtsebomnama imomerecénama. Chca entsamna, Bëngbe Bëtsabe Uabainama y chabe soyëngama, ndayiñe bënga mondošbuaché y

entsanga mondbétsabuatambaye, ínÿenga podesca ndoñe chamondétsóyebuambnama.

² Y chë imobomna Jesucristbeñe ošbuáchiyënga nduiñënga, chëngbioye nÿe batsá ndoñe chamondétsarrespetana, er chënga Jesucristbeyeca chëngbe catsátanga mondmëna, y entsamna más tšabá jtsaservénana, er chëngbe trabajuentša tšabe soyënga imóyëngacañe, Jesucristbeñe ošbuáchiyënga mondmëna, y Bëngbe Bëtsabe bonshánënga.

Jtsiyenana Bëngbe Bëtsá jadórama soyënga jtsamëse, endmëna chë ndegombre bomnana

Quem soyënga cmontsamna entsanga jtsabuátambayana, y becá jtsëtsëtsnayana chca chacmóyaunama:

³ Nderado nda inÿe soyënga tojtsabuatambá, y ntšamo bënga mondëjuabnacá, chë Bëngbe Utabná Jesucristbiana ndegombre buatëmbana soyama, ni chë buatëmbánana ntšamo jtsiyenama Bëngbe Bëtsábioye jadórama yomna soyënga jtsamëse, ndoñe cachcá bëngcá tontsejuabnase,

⁴ cha nÿe cachá puerte uámana entšá yojtsenobiamná, y tondaye ndosertaná yojtsemna. Cha tša jtsogustánana ba soyëngama y palabrengama jabuachana jtsenatsëtsnayana, y cha nÿe chama vida jésebomnana. Cha chca yomna causa, nÿe jtsebošana chë inÿa tojashjache soyënga jtsebomnama, nÿetscanga ndoñe cachcá chamondëtsejuabnama jtsamana, ínÿengbioye joyánguanguama jtsebošana, bacna soyënga ndoñe ndegombre soyënga ínÿengbiana jtsejuabnayana,

⁵ y ínÿengaftaca nÿe sempre jtſenpenzéntſiayana, er chéngbe juabniñe nÿe bacna ſoyénga jtſebomnana, ché ndegombre ſoyénga quematábuatma, y jtſejuabnayana ché ſoyénga Bèngbe Bètsá jadórama jtſamana, nÿe más ſoyénga jójéngacñama yoser-vena ca.

⁶ Ndegombre canÿe entſá bètsá tſabiana jéſtsaſhjáchana, cha tojtſiyena Bèngbe Bètsábioye jadórama ſoyénga jtſaméſe, y sempre oyejuayá nÿe ché tojtſebomna ſoyéngaca tojtſemnéſe.

⁷ Er bēnga tmojanonÿná ora, quem luaroye bēngaftaca tondaye tmonjániyēbo, y quem luarentſana cach tondaye quemochatobenaye jéſtsocñama.

⁸ As, bēnga ndayá jaſama y ndayá jtichētjuama tmojtſebomnéſe, ché ſoyéngaca oyejuayénga mochtſemna.

⁹ Pero ché bomnénga jtſemnama tmojtſeboſénga, bacna ſoyénga jamama tojócochéngo ora, ndoñe ntſemorochana y pronto chiñe jotsatſana, mo bayá uachmaniñe cuafjotsatſcá, ché entſanga Satanasbe cucuatſiñe ndeolpe jotsatſana; chora chénga jtſamana ſoyénga mo ché juabna ndbomnéngcá, y ché cachéngbiana ndoñe tſabe ſoyénga tmojtſaméngbe juabnéngaca. Y mo ché uándbemana barco, bēts búyeshe aſentoye tojtſenatjēmbcá, cachcá, ché bacna juabnénga bomnama, chéngbioye mochántſapochocaye y nÿeſca teſcama mochántſacaſtigaye.

¹⁰ Crocénana jtſebomnama yapa jtſeboſana, jamana entſabe ainanentſana nÿeſca bacna juabnénga y ſoyénga chaóbocnama; y báſeſta entſanga, crocénana jtſebomnama yapa

jtsebošana causa, tmojtsajbaná ošbuáchiyana chë Bëngbe Bëtsabe soyënguiñe, chë bënga mondošbuaché soyënguiñe, y chca cachëngbiana tmojama puerte chamosufrima y bëts ngménana jtsebomnama.

Chë tšabe soyama jtsenojuerzánama, ošbuáchiyana sempre chaotsemnama

¹¹ Pero aca, Bëngbe Bëtsabiana oserverná, chca benachentšana cochtsojuánañe. Nya cochtsentšana, chë Bëngbe Bëtsabe bominyiñe tšabá yomncá jtsamama, chë ndayá Bëngbe Bëtsá jadórama yomncá jtsamama, Jesucristbeñe puerte jtsošbuáchiyama, nyetscanga jtsababuányëshanama, Bëngbe Bëtsábeñe jtsobátmanëse puerte uantado padecena soyënguiñe jtsemnama, y corente jtsababuányëshanëse nyetscanga chacotsënyayama.

¹² Chë tšabe soyama, ošbuáchiyana joboguiyanama cochtsenojuerzana. Chë nyetsca tescama yomna tšabe vida cochjashjache; chama Bëngbe Bëtsá tcmojanchembo y bëtsá entšangbe delante tconjánayana tšabe soyënga Jesucristbiana, ndayiñe aca icošbuaché.

¹³ Y mora, Bëngbe Bëtsabe delante, nda endbama lempe ntšamo quem luarentše yobinyncá vida chaotsebomnama, y Jesucristbe delante, ntšamo cachabiana ndegombre bemncá Poncio Pilatbe delante lempe tojanayaná, chatbe delante cbontsemánda,

¹⁴ lempe cochjama ntšamo tcbonjauyancá, ndocna soye chacmondëntšashbe jamama, y cochtsiyena, ntšamo ndocná tondaye chaondëtsebomna jayanama aca bacna soye

tcojama ca. Y chca cochtsama Bëngbe Utabná Jesucristo quem luaroye yochjésabëntscuana.

¹⁵ Y nÿa chë soyama chë tempo chaojóshjango ora, Bëngbe Bëtsá chca echanjínÿanÿiye, er cha endmëna chë corente bendición bomná y chë nÿe canÿe Mandado. Cha nÿetsca reyëngbiana, chë más uámana Rey, y nÿetsca amëndayëngbiana, chë más uámana Utabná.

¹⁶ Nÿe cha ndoñe bondmëna ndocna te ntjóbanana, y cha canÿe bëts buashinÿinÿana luarentse endoyena y choye ndocná yondobena jobéconana. Cha ndocná tbonjinÿe y ndocná yondobena jinÿana. ¡Entsanga nÿets tempo chamotsinÿanÿná cha puerta bëtsá y obená bëtsemnama! Chca chaotsemna.

¹⁷ Chë quem luarentsa soyëngaca bomnënga imomnënga, cochjámëndaye enábotamnayënga ndoñe chamondëtsemnama, ni lempe tšabá yochjóbcnama, bëtsá soyënga bëtsebomnama ndoñe chamondëtsobátmana, er chë tcobomna soyëngama ndoñe ntsótatšëmbuana ndayëntsoñama chca mochtsebomnama; pero aíñe, Bëngbe Bëtsábeñe jtsošbuáchiyëse, chënga chábeñe chamotsobátmana. Cha endmëna chë sempre bëtsá soyënga šnetsatšatnayá; y chca, cha jamana bënga chamotsobena nÿetsca chë soyëngaca oyejuayënga jtsemnama.

¹⁸ Ntšamo tšabá yomncá chënga chamotsama, ba tšabe soyënga chamotsama, y sempre tšabe ainánaca chamotseprontana entsanga ba soyënga jatšatayama, y ndaye tmobomna soye entsángaftaca jenájatayama.

¹⁹ Mo nda bëtsá shajuana tojtsábuajo y jtse-

tatšëmbuana yochtsebomna más chcoye jasama, cachcá, quem bomnënga ba tšabe soyënga tmojtsamëse, mochántsetatšëmbo chënga bëtscá tšabe bendicionënga más chcoye mochtsebomnama. Y chënga chë soyënga tmojtsamëse, chënga chë ndegombre vida, chë nyetsca tescama yomna tšabe vida mochanjëftsashjache.

Inye soye Timotéobioye tbojanbonjë

²⁰ Timoteo, ndayá Bëngbe Bëtsá tcmojabonyecá, botamana cochtsinyëna. Entšanga nje quem luarentša soyëngama encuéntayana, ndoñe cattsuenana, ni chë ndoservena soyëngama jabuachana enatsëtsnayana, chë ndayama entšanga jtsichámuana becá osertánanentšana chca yóbocana ca, pero ndegombre chca ndoñe ntsemnana.

²¹ Atše chca sentsichamo, er báseftanga chca osertánana imobomna ca ichámënga, Jesucristbeñe ošbuáchiyana y chë bënga mondošbuaché soyënguiñe ošbuáchiyana tmojtsajbaná.

Atše, Bëngbe Bëtsá sëntseimpadana, ácbeñe tšabe bendicionënga chaotsemnana.

Bëngbe Bëtsa Cabëngaftaca Entsoyebuambna New Testament in Camsá

copyright © 2009 Wycliffe Bible Translators, Inc.

Language: Camsá

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Camsá

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-05-05

PDF generated using Haiola and XeLaTeX on 18 Apr 2025 from source files
dated 29 Jan 2022
19104c0e-9046-5ff3-82fb-eb838c88dcf9